



Broj: 01-50-1-15-43/08

Sarajevo, 29. decembra 2008. godine

## **Z A P I S N I K**

### **43. sjednice Predstavničkog doma Parlamentarne skupštine Bosne i Hercegovine, održane 29. decembra 2008. godine**

Sjednica je počela u 16,20 sati. Prisustvovalo je 37 poslanika. Opravdano su izostali: Beriz Belkić, Jozo Križanović, Jerko Ivanković Lijanović, Jovan Todorović i Milenko Grabovac.

Iz Vijeća ministara BiH sjednici su prisustvovali ministri Bariša Čolak, Tarik Sadović, Božo Ljubić, Safet Halilović, Dragan Vrankić te zamjenici Fuad Kasumović i Srđan Arnaut.

Iz međunarodnih organizacija sjednicu su pratili predstavnici: OHR-a, OSCE-a, EUSR-a, američke ambasade, Ambasade Velike Britanije te nevladine organizacije Centri civilnih inicijativa.

Predsjedavajući je, u vezi s prijedlogom dnevnog reda, kazao da je u pozivu za sjednicu predviđeno razmatranje samo jedne tačke, a to je Prijedlog zakona o Budžetu institucija BiH i međunarodnih obaveza BiH za 2009. godinu (prvo čitanje). Međutim, Vijeće ministara BiH je u međuvremenu u parlamentarnu proceduru dostavilo Prijedlog zakona o dopuni Zakona o carinskoj tarifi BiH sa zahtjevom da se razmatra po hitnom postupku, u skladu s članom 127. Poslovnika. Ovaj zahtjev Vijeća ministara BiH uvršten je u dnevni red, s obzirom da je riječ o obaveznoj tački dnevnog reda.

U raspravi o dnevnom redu učestvovali su: Sefer Halilović, Momčilo Novaković, Denis Bećirović i Niko Lozančić.

Sefer Halilović predložio je da se dnevni red dopuni tačkom koja bi glasila: Imenovanje Istražne komisije Predstavničkog doma za utvrđivanje prijema i trošenja donatorskih sredstava koje je Bosna i Hercegovina dobila u periodu od 1996. do 2008. godine. U diskusiji je podsjetio da zaključci Istražne komisije Doma, koja je osnovana 2003. godine sa istim zadatkom, nisu realizirani te da nije utvrđeno na koji je način utrošeno više od 8 milijardi doniranih sredstava.

Momčilo Novaković predložio je da se s dnevnog reda skine Zahtjev Vijeća ministara BiH za razmatranje Prijedloga zakona o dopuni Zakona o carinskoj tarifi BiH po hitnom postupku, u skladu s članom 127. Poslovnika, te da se razmatra na narednoj sjednici Doma. Kazao je da je većina poslanika tek danas dobila ovaj zakonski prijedlog pa zbog toga nije ni spremna za raspravu i predložio da se, u skladu s ranijim dogovorom, na današnjoj sjednici razmatra samo Prijedlog zakona o Budžetu institucija BiH i međunarodnih obaveza BiH za 2009. godinu.

Denis Bećirović rekao je da je na posljednjoj sjednici Doma u ovoj godini trebalo da bude razmatran i Izvještaj o radu Vijeća ministara BiH u 2008. godini i citirao odredbe člana 163. Poslovnika kojima se regulira ovo pitanje. Istakao je da Vijeće ministara BiH za dvije godine mandata još nijednom Parlamentarnoj skupštini BiH nije dostavilo izvještaj o radu i pozvao predsjedavajućeg da uspostavi komunikaciju s Vijećem ministara BiH s ciljem dostavljanja izvještaja do naredne sjednice Doma.

Predsjedavajući je kazao da će Kolegij uputiti Vijeću ministara BiH poziv za dostavljanje Izvještaja o radu u 2008. godini. U vezi s prijedlogom Momčila Novakovića, kazao je da je i na sjednici Kolegija raspravljano o tome da li da se Zahtjev Vijeća ministara BiH za razmatranje Prijedloga zakona o dopuni Zakona o carinskoj tarifi BiH po hitnom postupku uvrsti na dnevni red 43. ili naredne sjednice i tada je zaključeno da se radi o obaveznoj tački, pa se ona ne može ni skidati s dnevnog reda.

Predsjedavajući je zatim dao na glasanje prijedlog Sefera Halilovića za dopunu dnevnog reda. Ovaj prijedlog usvojen je sa 21 glasom „za“ (iz Federacije BiH 14, iz Republike Srpske sedam), šest „protiv“ i četiri „suzdržana“ glasa i uvršten u dnevni red kao treća tačka.

Predsjedavajući je za 43. sjednicu Predstavničkog doma konstatirao sljedeći

## DNEVNI RED

1. Prijedlog zakona o Budžetu institucija BiH i međunarodnih obaveza BiH za 2009. godinu (prvo čitanje);
2. Zahtjev Vijeća ministara BiH za razmatranje Prijedloga zakona o dopuni Zakona o carinskoj tarifi BiH po hitnom postupku, u skladu s članom 127. Poslovnika;
3. Imenovanje Istražne komisije Predstavničkog doma za utvrđivanje prijema i trošenja donatorskih sredstava koje je Bosna i Hercegovina dobila u periodu od 1996. do 2008. godine.

### **Ad. 1. Prijedlog zakona o Budžetu institucija BiH i međunarodnih obaveza BiH za 2009. godinu (prvo čitanje)**

Predsjedavajući je dao kratke uvodne napomene.

O ovoj tački vođena je duža rasprava. U raspravi i replikama učestvovali su: Sadik Bahtić, Ekrem Ajanović, Rifat Dolić, Remzija Kadrić, Drago Kalabić, Sadik Ahmetović, Savo Erić, Bajazit Jašarević, Husein Nanić, Selim Bešlić, Velimir Jukić, Remzija Kadrić, Slavko Jovičić, Milorad Živković, Bakir Izetbegović, Branko Dokić, Vinko Zorić, Azra Hadžiahmetović, Niko Lozančić, ministar za ljudska prava i izbjeglice Safet Halilović, Zlatko Lagumdžija, Momčilo Novaković, Adem Huskić, Lazar Prodanović, Šefik Džaferović, Sefer Halilović i ministar finansija i trezora BiH Dragan Vrankić.

S obzirom da je za neke poslanike bio sporan zaključak sadržan u Mišljenju Komisije za finansije i budžet, prilikom glasanja Sadik Bahtić i Azra Hadžiahmetović predložili su da se najprije glasa o Mišljenju o principima Prijedloga zakona, a zatim o zaključku. Suprotan stav iznijeli su Lazar Prodanović i Šefik Džaferović.

Šefik Džaferović citirao je član 106. stav (1) Poslovnika i naglasio da se ovdje radi o glasanju o principima Prijedloga zakona te da se usvajanjem Mišljenja nadležne komisije usvaja i sve ono što je sadržano u tom mišljenju.

Predsjedavajući se saglasio s ovim tumačenjem odredbe Poslovnika.

Prijedlog zakona o Budžetu institucija BiH i međunarodnih obaveza BiH za 2009. godinu usvojen je u prvom čitanju sa 23 glasa „za“ (iz Federacije BiH 15, iz Republike Srpske osam), sedam „protiv“ i četiri „suzdržana“ glasa, sa zaključkom sadržanim u Mišljenju Komisije za finansije i budžet, koji glasi:

**„Zadužuju se Komisija za finansije i budžet Predstavničkog doma Parlamentarne skupštine BiH i Ministarstvo finansija i trezora BiH da, u saradnji s resornim ministarstvima, u amandmanskoj fazi utvrde Prijedlog zakona o Budžetu institucija BiH i međunarodnih obaveza BiH za 2009. godinu, sa strukturom prihoda koja bi bila u okvirima koje je utvrdilo Fiskalno vijeće BiH i strukturom rashoda u kojoj bi bili uvaženi, u granicama mogućnosti, i prijedlozi Predsjedništva BiH.“**

### **Ad. 2. Zahtjev Vijeća ministara BiH za razmatranje Prijedloga zakona o dopuni Zakona o carinskoj tarifi BiH po hitnom postupku, u skladu s članom 127. Poslovnika**

Nakon kratkih uvodnih napomena predsjedavajućeg, u raspravi su učestvovali: Azra Hadžiahmetović, Momčilo Novaković, Slavko Jovičić, Mirko Okolić, Šemsudin Mehmedović, Velimir Jukić i Zlatko Lagumdžija. Svi učesnici u raspravi saglasili su se u konstataciji da ne postoje razlozi za hitnu proceduru.

Prilikom glasanja o zahtjevu za hitni postupak, nije bilo glasova „za“, 33 poslanika bila su „protiv“ i jedan „suzdržan“. Predsjedavajući je konstatirao da nije usvojen zahtjev Vijeća ministara BiH za razmatranje Prijedloga zakona o dopuni Zakona o carinskoj tarifi BiH po hitnom postupku, u skladu s članom 127. Poslovnika.

Zatim se, u skladu s Poslovnikom, glasalo o skraćenoj proceduri. Sa 23 glasa „za“ (iz Federacije BiH 13, iz Republike Srpske 10), 12 „protiv“ i bez „suzdržanih“ glasova, Dom je odlučio da se Prijedlog zakona o dopuni Zakona o carinskoj tarifi BiH razmatra po skraćenom postupku, u skladu s članom 126. Poslovnika.

**Ad. 3. Imenovanje Istražne komisije Predstavničkog doma za utvrđivanje prijema i trošenja donatorskih sredstava koje je Bosna i Hercegovina dobila u periodu od 1996. do 2008. godine**

Predsjedavajući je napomenuo da ovdje postoji samo prijedlog tačke dnevnog reda bez prijedloga članova komisije. Dodao je da je, u obavljenim konsultacijama, Sefer Halilović predložio da svaki klub poslanika predloži po jednog kandidata u ovu istražnu komisiju.

Sefer Halilović je, uz spomenutu, kao drugu mogućnost naveo da se, osim članova koji su bili članovi ove komisije u prethodnom sazivu Doma: Milorada Živkovića, Adema Huskića i Jozе Križanovića, u Komisiju imenuju još i: Halid Genjac, Vinko Zorić, Hadži Jovan Mitrović, Milica Marković, Azra Hadžiahmetović i Sefer Halilović.

U raspravi o ovoj tački učestvovali su: Milorad Živković, Adem Huskić, Velimir Jukić, Vinko Zorić i Šemsudin Mehmedović.

Milorad Živković predložio je sljedeći zaključak, koji su podržali i ostali učesnici u raspravi:

**„Zadužuje se Kolegij Predstavničkog doma u proširenom sastavu da do naredne sjednice Doma, koja će biti održana 21.1. 2009., dostavi Domu Prijedlog odluke kojom će odrediti nadležnost, ciljeve, zadatke, ovlaštenja, rokove, kao i sastav Istražne komisije Predstavničkog doma za utvrđivanje prijema i trošenja donatorskih sredstava koje je Bosna i Hercegovina dobila u periodu od 1996. do 2008. godine.“**

Zaključak je usvojen jednoglasno - sa 35 glasova „za“ (iz Federacije BiH 23, iz Republike Srpske 12).

Time je realiziran dnevni red.

Predsjedavajući je zaključio sjednicu i obavijestio Dom da će naredna 44. sjednica biti održana 21. 1. 2009.

Zatim je svima čestitao predstojeće novogodišnje praznike, a vjernicima pravoslavne vjeroispovijesti čestitao je Božić.

Sjednica je završena u 19,50 sati.

Sastavni dio Zapisnika je transkript 43. sjednice Predstavničkog doma.

SEKRETAR  
PREDSTAVNIČKOG DOMA  
**Branka Todorović**

PREDSJEDAVAJUĆI  
PREDSTAVNIČKOG DOMA  
**Niko Lozančić**